

Was Sache!

Omm Stommdisch seet de Karl uff oomol zum Schorsch: Bei doim Kusseng Hobbes dut de Hausseesche gons schee schiefhänge.

Ei doo waaß isch joo garnix defoo, dut de Schorsch ze Antwort gewwe, warum donn?

Seet de Karl: Och, dess iss gons schlimm mett dene. Dem soi Emmi hott gesaad, isch zieh aus unn gieh bei moi Mudder, doo hott de Hobbes gelacht unn gemoont, gieh hie, die leit schunn fuffzeh Johr uffem Kerrschhof. Doo war se erst rischdisch wild, die Emmi. Willsde misch loswerrn mett moine graue Hoorn, hottse gekrische, donn mach disch ab zu dere Schlumbel mett dem schwarze Schtruwwelkobb.

Unn dess iss su kumme. Die zwaa warn beim Aldi oikaafe, die Emmi iss vorneweg unn de Hobbes meddem Waache hinnerher. Unn uff oomol war doo su e schwarzhoorisch Fraa, die hott de Hobbes gefroochd, ob er wisse deet, wo se de Puderzucker finne kennt. De Hobbes hott soin Waache stieh losse unn iss mett dere Fraa um die Eck vunn dene Regale unn hodden ihr gezeischd. Donn wollder widder bei soin Waache, aber der war fort. Ah ja, denkt de Hobbes, die Emmi hodden mettgenumme unn hott die zwaa, also de Waache unn die Emmi, gesucht. Alser se gefunne hott mächt die Emmi e schebb Schnut, de Hobbes wusst gar nitt warum. De Hobbes hott also de Waache widder iwwernumme unn iss de Emmi hinnerher. Unn doo iss joo schunn widder die Schwarzhoorisch kumme unn hott de Hobbes nooch griechische Olive gefroochd, unn weiler dess nitt gewissd hott, hodder gesaad, ei wisse se was, mir frooche moi Fraa, die waaß bestimmt, wo Se die Olive finne kenne. Also sinnse de Emmi hinnerher unn wie se se gefunne hadde hott de Hobbes gefroochd ob se wisse deet, wo die griechische Olive wärn, die die Fraa doo suche deet. Die Emmi hott die Fraa oogezeichnet: Dess waaß isch nitt, weil su Sache esse merr nitt, suche Se ihr Zeisch doch sellwer.

Na, Sie sind aber unfreundlich, hott die Fraa zu de Emmi gesaad, Ihr Mann hingegen, dass ist ein äußerst freundlicher alter Herr. Unn isch bin e unfreundlich ald Fraa, hott die Emmi gegauzd, awwer wennse was mett dem ahle Monn doo oofonge wolle, bittschee, Sie kennen hawwe. Unn donn hottse de Waache geschnabbd, iss direkt onn die Kass gefahrn unn hott de Hobbes oofach stieh losse.

Doo kennderr eich vorstelle, was de Hobbes dehoom gemacht hott, geschennd hodder: Wie du mett fremde Leit umgehe dust, merr muss sisch joo schäme.

Hosde geseh, was dess uffgedaggeld Weibsbild dir ferr scheene Aache gemacht hott? – su e Schnersch soll sisch schäme unn nitt isch.

Die hott awwer gut ausgeseh, hott de Hobbes grad noch gesaad, alsem schunn e halb Pund Butter onn de Kobb gefloche iss. No ja, unn donn hottse dess mett ihrne Mudder gesaad unn de Hobbes meddem Kerrschhof unn donn war Funkstille, seit vier Daach babbele die zwaa nimmi mettenonner, die Emmi will sich scheide losse.

Was Sache, habb isch gesaad, scheide losse – wie ald issen die Emmi?

Ei finfunnsechsisch, hott de Schorsch ze Antwort gewwe.

In dem Aacheblig iss de Hobbes mett de Emmi per Händche in die Wertschaft zum Middaachesse kumme.

Gude ihr Leit, hott de Hobbes gesaad unn die Emmi hott uns oogelachd.

Wie die Emmi nooch emm Disch geguggd hott, frächt de Schorsch: No, alles widder gut? Hobbes, wie hosden dess gemacht?

Dess werrn isch derr grad uff die Nas binne, hott de Hobbes gesaad unn iss de Emmi nooch – unn mir hawwe bleed hinnerher geguggd. Eiern Honnes